

radio scola



Cuntgnü 324 Güerg Jenatsch, I
 325 Güerg Jenatsch, II
 da Claudio Gustin, Sa. Maria

5-84

radio scola

Organ uffizial da la Cumissiun da Radioscola CRR
(Cuminanza Rumantscha da Radio a Televisiun)

Annada 31, 1984, nr. 5

Ediziun dal Radio Rumantsch Cuira

Abunament frs. 12. — / 6 carnets ad onn

pustaziuns d'abunament e da carnets singuls èn da drizzar al post
da programs, via dal teater 1, 7000 Cuira, tel. 081/22 95 66

Cuverta da Jacques Guidon

Temp d'emissiun mintgamaì la gievgia (il glindesdi sequent la repetiziun) sin il 2. program e sin la lingia 1 dal radiotelefon a las 9.30–10.00.

Cumissiun da Radioscola

Richard Cavigelli, president e represchentant dal radio,
7000 Cuira, tel. 081/22 95 66
Claudio Gustin, inspector, 7531 Sta. Maria, tel. 082/8 53 05
Mario Jegher, scol. sec., 7451 Tinizong, tel. 081/74 17 24
Augustin Manetsch, scol. sec., 7180 Mustér, tel. 086/7 53 32
Romedi Reinalter, magister, Chesa Cristolais, 7503 Samedan,
tel. 082/6 44 85
Georgina Schaller-Gabriel, surmestra, 7431 Donat,
tel. 081/61 17 08
Olinda Tschalèr, scolasta, 7130 Glion, tel. 086/2 17 61

Cumissiun redacziunala

Richard Cavigelli, coordinatur e responsabel per l'ediziun
Rico Falett, 7554 Sent, tel. 084/9 10 32
Mario Jegher, 7451 Tinizong, tel. 081/74 17 24
Cristian Joos, post da programs, 7000 Cuira, tel. 081/22 95 66



Cuntgnü e datas d'emischiun

18-10-84
22-10-84

Güerg Jenatsch, I
da Claudio Gustin, Sa. Maria

s-chalin ot

01-11-84
05-11-84

Güerg Jenatsch, II
da Claudio Gustin, Sa Maria

Chi nun ha amo mai dudi alch da Güerg Jenatsch? Quist ravarenda, guerrier, politiker, quist patriot be temperamaint e fanatissem, ha influenzà fermamaing ils «Scumpigls grischuns».

**Collecziuns cun plüssas fotografias our da quist «Radioscoula» pon gnir retrattas per classes gratuita-
maing pro la Stampa Romontscha, 7180 Mustér (tel. 086 - 7 54 41)**

L'adöver d'ün bindel acoustic facilitescha in mincha cas l'elavraziun da quista materia.

Güerg Jenatsch e'l temp dals Scumpigls grischuns

da Claudio Gustin, Sa. Maria

Tschögns pel magister

Avant las emischiuns

- repetiziun da la geografia dal Grischun e da la Vuclina
- territori da las Trais Lias (skizza)
- las Trais Lias e lur vaschins (skizza)
- pass da muntogna importants in Grischun
- survista dals fats istorics fin al 1600
- situaziun politica in Grischun intuorn il 1600 cun: parti venezian-frances e parti spagnöl-austriac (Salis/Planta)
- leger «Il chavaller Christian Hössli» (Stretta patria I, pag. 19)

Durant las emischiuns

- charta da geografia dal Grischun
- noms da las personas chi gnaran manzunadas
- cumpletter il fögl da lavur «Cuolp e cuntercuolp»
- ev. muossar illustraziuns

Davo las emischiuns

- leger e discuter ils texts dal mordraretsch da Pompejus Planta e da la «rebelliun in Vuclina»
- biografia da Güerg Jenatsch
- poesias sur da Güerg Jenatsch
- evt. tadlar l'emischiun 131 (1973/5) (Charta da Jenatsch als da Sent)
- guardar e discuter la seria da diapositivs nr. 27 DLV Cuoirà

La prüma mità dal 17avel tschientiner sarà stat il temp il plü burascus, inquiet e crudel da tuot l'istorgia grischuna. Id ha dat intrigas politicas, dispittas tanter las confessiuns, polemicas tanter famiglias da l'aristocrazia, tradimaints, mordraretschs, corrupziuns, imbruogls, insomma tuot quai chi's po be s'imaginar sco delicts criminals.

La populaziun in bleras valladas dal Grischun ha gnü blier da partir suot las occupaziuns da las armadas estras chi han plündragià e lura miss in tschendra bliers da noss cumüns, impustüt in Engiadina Bassa e Val Müstair. Ons da fomina e la pesta han svödà las chasas ed impli ils sunteris.

Las plajas da tuot quists flagels han gnü lönch da guarir.

Il stadi da las Trais Lias d'eira rivà quella jada in noschs peis d'aua. La libertà d'eira ida persa, il pövel vaiva da sotar davo'l tschüvel da pussanzas estras. Üna jada d'eiran quai ils Austriacs o ils Spagnöls, tschella jada ils Venezians o ils Frances. A quel temp dals Scumpigls grischuns s'ha referi eir Martin Martin cur ch'el ha scrit sia cuntschainta «Canzun davart la libertad da nossas traies ligias». Notain quatter vers da quista chanzun:

*T'algord'impâ dal temp passà
Co Deis la terr'ha chastiâ
Cun spad'è foe statt grittantâ
Ch'ìl'ha tut la nossa LIBERTAT.*

*In greiv'angoscha stat redüt
Tot noss pâgiais qua stat deschedrüt
Quai tot ha fatt ilg noss puchiâ
Chia Deis ha tut la LIBERTAT.*

*Vuo lüdischs stuveivat jüar
Statuts dad eisters Fürsts salvar
Deis ha manâ, ilg fatt müdâ
Subjection in LIBERTAT.*

*Quant saung hvai spons vuos Pardavants
Per sa spendrar our da tyrans
Cun pauc danaer ha Deis giüdâ
Ch'nuo vain cumprâ la LIBERTAT.*

Chenüns sun stats ils motivs chi han strat il Grischun aint il rodome da la politica internaziunala, aint illa buoglia da la Guerra da trent'ons?

Chi sun stats ils homens chi han manà las Trais Lias tras quel temp da dischuorden e d'anarchia, da misergia e da corrupziun?

In duos emischiuns da «Radioscola» vöglià provar da respunder a quistas dumondas.

Ils böts ch'eu less raggiundscher cullas emischiuns sun:

Il scolar cugnuoscha

- 1) fats importants da l'istorgia grischuna dal 16 e 17avel tschientiner
- 2) l'importanza cha'ls pass da muntogna in Grischun vaivan pel transit da marchanzia e pel movimaint da truppas
- 3) las consequenzas desastrusas da cumbats guidats da fanatissem e da crudeltà
- 4) la situaziun politica ill'Europa dal 17avel tschientiner
- 5) fats importants our da la vita da Güerg Jenatsch

Il scolar inclegia cha l'intoleranza, il fanatissem e l'anarchia pudessan manar ad ün pövel a la perdiziun.



Istorgia grischuna es istorgia dals pass



Guerriers grischuns in servezzan da la Frantscha

Pass da muntogna importants pel trafic dal nord al süd da las Alps

Vers il cuntadi da Milan: San Bernardin
Splügia
Set
Güglia
Malögia

In Vuclina: Bernina
Umbrail

Vers il Tirol: Flüela
Fuorn

Vers la Vuclina e'l Tirol: Scaletta

Las Trais Lias tanter ils gronds imperis da l'Europa



Cuorta survista da l'istorgia dal stadi liber da las Trais Lias avant il 1600

1367 Lia da la Chadè
 1424 Lia Grischa
 1436 Lia da las desch Drettüras
 1471 Uniun da las Trais Lias a Vazerol
 1475 Guerra da las giallinas; Bart Guglielm
 1499 Guerra svabaisa; Chalavaina; duonna Lupa
 1500 Charta da las pensiuns
 1512 Conquista da la Vuclina
 1523 Cumanzamaint da la refuorma in Grischun
 1525 Guerra da Müsch; Gian Travers
 1524/26 Disputaziuns a Glion ed artichels chi reglan ils drets da privats, da las drettüras e da las baselgias.

1535 Il cuntadi da Milan chi d'eira stat lönch il motiv da littas tanter la Frantscha e'ls da Habsburg va in possess da Carl V.

1537 Fundaziun da la Sinoda evangelica retica. La refuorma as derasa bain svelt in bod tuot las valladas dal Grischun ed eir in Vuclina. I cumainzan las rivalitats tanter catolics e protestants.

1545–63 Il concil da Trient refüsa la cretta protestanta ed iniziescha la cunterrefuorma. Il cardinal da Milan, Carl Borromeo, sustegna il cumbat cunter ils refuormats in Grischun ed in Vuclina. El va dafatta svesa a Mustér (1581) e predgia illas valladas al süd da las Alps cunter il protestantissem. Quista actività davart catolica svaglia la disfiduzcha e l'ira dals protestants.


Ün vers da la «Chiantzun davart la libartad da Grischuns» tuna:

*Carl Baromeus, chiardinaell,
 Quel pock prus hom, quel seinckg papael:
 Quist anns ho eir pruvo
 La Vall d'Vatlina d'ans pigliaer,
 Cun tradimaint d'ans ell'ivuler.
 Mo Dieu quel ns ho ggiüdo.*

Ils duos partits confessiunals as cumbatan in Grischun ed illas terras sudittas (Buorm, Vuclina, Clavenna). I nu's danti glian be in dumondas da la cretta. Il masdügl da politica e religiun maina repetidamaing a conflicts. In dumondas da la politica interna ed eir invers l'ester sun las opiniuns dal pövel differentas. I manca l'uniun.

1556 Partiziun da l'imperi habsburgais: Philipp II. survain la Spogna, Milan, Napoli, Burgogna e'ls Pajais Bass. Ferdinand I. survain l'Austria e dvainta imperatur. Tanter il duos pussants imperis da la chasa da Habsburg staiva, sco ün cuogn, il stadi liber da las Trais Lias cun sias vias

da transit chi colliavan il süd ed il nord da las Alps.



Per l'Austria e per la Spogna d'eira important d'avair bunas relaziuns culs Grischuns e da survgnir dad els il dret da passar – in cas da guerra – cullas armadas sur ils pass da muntogna. Ambascaduors spagnöls ed austriacs tscherchavan dad influenzar ils manaders da las Trais Lias e da tils guadagnar per lur chosa.

In üna veglia chanzun populara as legia t.o.:

*Il rai d'Spogna ha cun seis cussagl
 Muossà a nus zuond trid cumbagl.
 Cun imprometter blers daners
 Ha'l cumprà il cour da blers.*

Quista politica dals Spagnöls ed Austriacs nu plashaiva brichafat als Frances e Venezians. Els nu laivan cha'ls da Habsburg dvantessan massa pussants e chi vessan üna colliaziun directa tanter Tirol e Milan. Eir lur ambascaduors d'eiran activs e nu spargnaivan ingünas fadias ed impustüt na munaida per trar l'aua sün lur muglin. Eir lur böt d'eira quel da survgnir il dret da passagi sur ils pass da muntogna. Il pövel grischun d'eira separà in duos gruppas: il parti frances–venezian ed il parti spagnöl–austriac.

parti spagnöl–austriac

parti frances–venezian

lös catolics
 manaders: PLANTA
 sustgnüts dals Confederats catolics (UR, SZ, LU) e dal papa

lös protestants
 manaders: SALIS
 sustgnüts dals Confederats protestants (ZH, BE, BS...) e dals predichants

VOPNA PLANTA



VOPNA SALIS



Dal 1600 al 1618

Intuorn il 1600 sun ils duos partits politics, ed ouravanttuoit lur manaders, magari activs perche cha minchün less far üna lia cun seis amis esters e less dar a quels il dret da passar libramaing sur ils pass da muntogna. Venezia e la Spogna distribuiscan sommas enormas a lur aderents in Grischun. I tils impromettan «rom e tom e mez Milan» per survgnir la magiuranza da las vuschs da la dieta da las Trais Lias.

Blers Grischuns as laschan büttar sablun aint ils ögls e nu badan las noschas intenziuns e las intrigas dals agents esters.

Homens bainpensonts admonischan a lur conva-schins da rafüdar tantüna cullas littas tanter pêr. I prouvan dad impedir cha las Lias as collian cun ün o tschel vaschin ester.

Hartmann da Hartmannis da Parpan, ün vair patriot, disch: «*As inchürai da far simlas lias! Cun quellas vendais vus la pasch e la libertà da nos pajais e til manais a la dischuniun ed a la dispitta. Las pussanzas estras sun amis fos. Vus trarat la cuorta e gnarat ingionats! Laschai dvert las alianzas cun prinzijs esters!*»

Ed ün oter admonischa:

«*Vos ölgs, Grischuns, avri indret!
La libertad, quel grond dalet
In priguel ais bain sgür.
Eug tem eir mal, chial pled da Deis
A terra gea suot ils peis,
Quant löng vlai vo durmir?*»

Dal 1603 reuschischa al diplomat venezian **Gian Battista Padavino** da far ün contrat cullas Trais Lias. I vain cumbinà:

1. La lia düra desch ons.
2. Venezia po ingaschar per sias armadas 4–6000 sudats grischunais.
3. Venezia po passar tras il Grischun cun sias truppas.
4. Venezia paja annualmaing 3600 curunas a las Trais Lias.
5. Las Lias pon retrar da Venezia a cundiziuns favuraivlas granezza e sal.

Padavino chi vaiva observà cun ögl critic la situaziun politica illas Lias rapporta:

«Es ist die Anarchie, schlimmer als eine grausame Tyrannis; es ist ein Schiff ohne Steuermann, allen Winden preisgegeben, es ist das vielköpfige Ungeheuer, unfähig, das Mittelmass zu üben, und trägt über den Augen die Binde der Leiden-


schaft, der Unwissenheit, der Hab-sucht und der Hoffart. Da die Geltung der Behörden zerstört und alles auf das Volk gestellt ist, nehmen Verwirrung und Wankelmut zu. Unter dem Schrecken, der die Tugend ohne Lohn lässt, den Unschuldigen verdammt und den Schuldigen freispricht, vermeiden die Männer, die sich und andere führen könnten, die Ämter, aus Sorge vor dem Volk, unter dem keiner so plump und gewöhnlich ist, dass er sich nicht für Staatsämter geeignet hielte und nicht nur Taue und Segel handhaben, sondern auch das Steuer ergreifen möchte.»

(Pieth, Bündnergeschichte, S. 193.)

E Fortunat Juvalta scriva:

«Eine zweifache Pest hatte schon früher die öffentlichen Angelegenheiten und die gesamte Verwaltung Bündens ergriffen, die Ämtererschleichung und die Habsucht. Anfangs im Verborgenen schleichend, nahmen sie durch Straflosigkeit und träge Nachsicht von Seiten der Oberbehörden schliesslich derart überhand, dass sie fast den ganzen Staatskörper ansteckten und verderbten. Nicht anders als durch Stimmenerschleichung und Bestechung konnten jetzt diejenigen ihr Ziel erreichen, die nach Ehrenstellen und besonders nach jenen einträglichen Veltliner Ämtern trachteten. Aber nicht bloss einzelne Private, sondern ganze Gerichtsgemeinden handelten mit den Ämtern wie mit einer Ware und erröteten nicht, das erste Amt in der Gemeinde, das Landammannamt, samt den Botenstellen zum Bundestag sowie die Ämter in den Untertanenlanden und andere Nutzungen durch öffentlichen Rat-schlag zu festgesetzten Preisen auf viele Jahre hin zu verkaufen und durch öffentliche Urkunden zu besiegeln.»

(Pieth, Bündnergeschichte, S. 176.)



La fortezza Fuentes, la «fossa dals Spagnöls», il «giuf dals Grischuns»

Ils Austriacs e Spagnöls sun fich grits cha las Trais Lias s'han colliadas cun Venezia. Il cunt spagnöl Alzevedo de Fuentes, chi regna daspö il 1600 a Milan, piglia vendetta e serra il commerzi da Milan vers il Grischun. Al cunfin da la Vuclina fa'l fabrichar üna fortezza per pudair controllar da là davent il trafic e per pudair attachar eventualmaing ils Grischuns.

Uossa cumainza pür inandret il cumbat tanter ils duos partits in Grischun. Ils ambaschaduors esters e'ls manaders da la politica illas drettüras fuan, aguaglian e zaccagnan da bel cuntin. Suvent vegnan els sustgüts eir da predichants e da preirs fanatices. Cur chi buoglia propcha pro üna gruppa vain bannida üna drettüra penala chi ha da trar sentenzcha cunter il parti inimi. E che sentenzchas!

In üna cronica veglia legiaina:

«Ano 604 vain frizà il pövel a far ün Strafgricht cunter Belì chi hvev'eir sgiamgià certs Partensers . . . usche eir cunter Casper Baselgia, chi sco Chastlan a Fürstenburg, hveva tribulà ils da Sta-Maria; quels gnin manats a Coira e torturats eir fich, cufessen d'havair ricevü da Milan 820. Dichatuns, ma auters hajen amo plü . . . vegnen condanats in tumult alla mort in Julio, Baselgia la sonda, Belì il lündeschdi, han fat fich bels discuors ant la fin, davart la vanità dil mond, & avisà pasch, sun ids cun grond anim alla mort . . .»

Bainbod organisescha il parti attachà üna cunterdrettüra penala. Las sentenzchas da l'inimi vegnan revochadas. L'adversari vain uossa landervia, e quai na cun damain crudeltà.

1607

Drettüra a Cuira. Il prüm cunter il parti frances-venezian e lura cunter il parti spagnöl-austriac.

1607

Drettüra a Glion chi annulescha las decisiuns da Cuira e tillas rimplazza tras otras chi van plü bain per staila als güdischs.

1612

La lia cun Venezia nu vain plü renovada. L'opposiziun spagnöla es pel mumaint plü ferma.

Il parti catolic cumbatta ouravanttuot pel mantegnimaing da la cretta in Grischun ed in Vuclina. Quai svaglia l'ira dals predichants giuvens chi as maisdan aint illa politica. Cun grond fanatissem s'ingaschan els pels interess da las famiglias aristocratas protestantas. Els vegnan eir pajats da quellas.

Ils manaders da quista generaziun da predichants extremists sun Blasius Alexander (Plasch Zonder) da Sent, Bonaventura Toutsch da Zernez, Caspar Alexius (Chasper Alesch) da Chamues-ch e Güerg Jenatsch da Samedan.

Lur prüm success hana a la Sinoda da Bravuogn dal mais mai 1618. Illa piazza da Georg Saluz vain tschernü Caspar Alexius sco decan dals ravarendas protestants.

Uossa cumainza quel temp d'anguoscha, da crudeltà, da guerras e d'occupaziuns tras armadas estras, il temp dals

1618 Ils d'Engiadina Bassa e da la Val Müstair marchan cun lur binderas cunter ils amis dal parti spagnöl. A Zernez plündriaina il chastè da Rudolf Planta, lura vana in Vuclina ed in Bergiaglia. A Suonder (Sondrio) piglia in fermanza a l'archipreir Nicolo Rusca ed in Bergiaglia a Gian Baptista Prevost, nomnà Zambra. La rotscha da sudats fanatics va culs praschuners fin a Tusan ingio chi vain fuormà ün tribunal penal da 66 güdischs. I vegnan tut pro eir 9 ministers, t.o. Jenatsch, Alexander, Alexius e Stefan Gabriel (da Glion). 157 persunas vegnan sentenzchadas. Ils güdischs sun severs. Il vegl Zambra (70) vain sentenzchà a mort e decapità. Rusca nu tegna oura la tortura e moura sül lö.

Rudolf e Pompejus Planta e lur paraint Jacob Robustelli vegnan sbandits per adüna.

Als 25 settember capita la sgrischaiuva disgrazcha a Plür. La muntogna crouda sülla citaetta benestanta. Passa 1000 morts suot la bouda!

(Leger «La ruina da Plür» dad Andri Peer, 1982!)

1619 La drettüra penala a Cuaira revochescha las sentenzchas da Tusan. La Sinoda a Zuoz decida da suspendar a Jenatsch ed Alexander per ün mez on da lur servezzan da ravarenda. La drettüra penala a Tavo annulescha las sentenzchas da Cuaira ed approva darcheu quellas da Tusan.

1620 **19 lügl:** Mordraretsch in Vuclina «Sacro Macello». Passa 600 protestants, homens, duonnas ed uffants perdan lur vita. Il manader da la «rebelliun» es Jacob Robustelli. Be pacs protestants, tanter dad els eir Jenatsch, as salvan mütschind sur il Muretto in Engiadina.

La Vuclina e Buorm as separan da las Lias.

26 lügl: Ils Austriacs vegnan cun ün'armada in Val Müstair ed erigian a Sa. Maria üna fortezza. Da qua davent pon els controllar las vias sur il Fuorn, sur l'Umbrail e sur Frael. Uossa hana üna colliaziun directa culla Vuclina e cun Milan.

«... tmond da gnir sursaglits da la vart da Buorm s'retren in Engiadina 1480 persunas. Quels cul Cavalier (Rudolf Planta) resten là. La sudada ardet Sielva e davo avoir butinà tuot, eir Sa. Maria e Valchava. Set vegls chi nun han pudü sieuer sun eir mazzats...»

Jenatsch buoglia da la rabgia cunter ils catolics. El metta d'vart la Bibla e piglia in man la spada. Il predichant es d'vantà sudà da manster.

Duos prouvas da reconquistar la Vuclina sun sainza success.

Las truppas dals 5 Lous (Svizra centrala) chi stan in servezzan da la Spogna vegnan cul colonel Beroldingen in Surselva. La Lia Grischa tratta cun Milan pervi da la Vuclina.

1621

6 favrer: Capitulat da Milan chi sgüra l'influenza da la Spogna in Vuclina e chi scu-monda là la religiun protestanta. Quist contrat vain acceptà be da la Lia Grischa.

25 favrer: Pompejus Planta vain mordrià sün seis chastè a Rietberg. Manaders dals aschaschins sun Jenatsch, Alexander, Ruinelli e Carl da Balcun Aut (da Müstair).



Pompejus Planta

marz: Las truppas da Beroldingen vegnan s-chatschadas. La Surselva revochescha il capitulat da Milan.

october: La terza prouva da recuperar la Vuclina nu reuschischa. Ils Grischuns perdan la battaglia a Buorm.

	26 october: Las truppas austriacas e spagnölas attachan las Lias da trais varts. Baldirun davent da la Val Müstair, Brion davent da Muntafun e Feria sü da Clavenna. 22 november: Baldirun e Rudolf Planta rivan cun lur truppas a Cuaira. Las Lias sun uossa in mans da l'Austria. Jenatsch e seis amis mütschan sur il Parnix giò'n Glaruna. Blasius Alexander vain tschüf e surdat a Baldirun. El vain manà a Puntina in praschun. Ün on plü tard, a Nadal dal 1622, moura el sül lö da supplizi. Il prüm til taglna giò il man dret (cun quel dess el avair mordrià a Pompejus Planta) lura vain el decapità.	1624	Il cardinal Richelieu dvainta manader da la politica in Frantscha. La Frantscha, Venezia e Savoia s'unischan cun l'intenziun da s-chatschar ils Austriacs e Spagnöls our dal Grischun. I vöglan gnir sevssa in possess dals pass da muntogna. Il Marquis de Cœuvres vain sco ambascadur frances in Svizra. El ingascha ün'armada in servezzan da la Frantscha. Cun quella vegnan battüts ils Spagnöls in Vuclina.
1622	schner: Il tractat da Milan vain acceptà. L'Engiadina Bassa, la Val Müstair, Tavo e'l Partens vegnan suottamiss directamaing a l'Austria. La religiun protestanta vain scumandada. Paders chapütschins vegnan in Engiadina e sforzan als protestants dad ir a messa. Dumengia da las Palmas: Revolta dals Partensers chi s-chatschan ils Austriacs our da la val. In gün capitulescha Baldirun. La libertà es da cuorta dürada. In avuost cumparan darcheu ils Austriacs in Engiadina Bassa. I van plündragiond sü da la val, van sur il Flüela e Scaletta a Tavo ed our il Partens. Ils patriots grischuns perdan la battaglia a Saas. In settember ston ils Grischuns acceptar il Dictat da Lindau. Las Ot Drettüras e l'Engiadina Bassa vegnan separadas da las Trais Lias.	1626	Davo la rain dals Grischuns via fan ils Frances ün contrat culla Spogna (a Monson)
			1. Las Lias nu pon trametter truppas in Vuclina. 2. Ils Vuclinas-chs pon tschermer svesa lur autoritads. 3. In Vuclina po gnir exercità be plü il cult catolic. 4. Sudats dal papa occupan la Vuclina. 5. Las Lias survegnan annualmaing 25 000 guldiners.
		1629	Ils Frances e'ls Spagnöls as dispittan pervi dal cuntadi da Mantua. Ün'armada imperiala austriaca marcha tras il Grischun. Quai es la terza occupaziun austriaca.
1622/23	On da la fom <i>La miseria s'ingrondiva intant per tuot il pajais. Per causa dals früts malmadürs, noscha vivonda as ras'ora il mal d'Ungaria tanter la soldada per tuot il pajais. Morin cun gronda dolor fin 2000. Creschond il frai va il Cont (Alvico da Sulz) a Cuaira cun ils seis, e qua murivan mincha di, gnivan chattats per strada morts e dalla spüz-zur s'ha amalà il pövel e süsura gniva la pesta chi regnaiva per tuot il pajais. In Engiadina quels pacs tuornats vivaivan in tuotta misergia, s-charsdà dal tuot. I durmivan sot ils vots in schlers cun strom, lur pac da viver nu pudaivan conservar da las mürs, intant chi durmivan gnivan sün la fatscha via e nan, mordevan nas e uraglias. Las früas missas insembel sül feld gnivan tuttas da la sudada e da quels chi eiran cun l'inimi . . .</i> <i>Usche fo quel inviern nomnà l'inviern da la fom lösch davo siond in Engiadina e Partens ün'angoscha sur l'autra . . .</i>	1629–31	La populaziun in nossas valladas ha dad indürar blers pantizis: imnatschas, oppressiuns, fomina, la pesta.
		1631	Il rai svedais Gustav Adolf cumbatta in Germania da la vart dals protestants. L'imperatur Ferdinand II. perda plüssas battaglias e perquai sto'l surlaschar Mantua als Frances. Ils Austriacs bandunan il Grischun. La Frantscha trametta al duca Henri de Rohan cun 3000 sudats in Grischun. Las Lias til surdan il cumond sur da tuot las truppas. I spereschon cha la Vuclina vegna darcheu in lur possess. Mo Richelieu ha oters plans.
		1635	Finalmaing survain Rohan il cumond dad attachar ils Spagnöls in Vuclina e da tour in possess las vias da transit. Cun gronda strategia til reuschischa da batter l'inimi illas battaglias da Livigno, Mazzo, Val Frael e Morbegno. Ün da seis meglders uffizials e cusgliaders es Güerg Jenatsch.



Henri de Rohan
«Il bun duca»

1636 Richelieu nun es intenziunà da restituir la Vuclina, cumbain cha Rohan til admoni-scha da nu sparmalar als Grischuns. La dischillusiun es gronda. Ils Frances chi d'eiran gnüts per deliberar il Grischun dal juf austriac nun han muos-chas da partir.

1637

Uossa s'unischan catolics e protestants cul intent da's deliberar da tuottas pus-sanzas estras. (Lia da la chadaina). Jenatsch tratta a la zoppada, davo la rain da seis patrun ed ami Rohan, cun l'Austria e la Spogna.

marz: Ils Grischuns as revolteschian. Ro-han sto capitular. Jenatsch til ha tradi.

mai: Las truppas francesas e'l «bun duca» bandunan il Grischun.

1638/39

Jenatsch dirigia la politica da la Trais Lias.

Trattativas cun l'Austria e culla Spogna.

In Grischun nascha dapertuot opposiziun cunter Jenatsch. Uffizials e politikers han temma ch'el dvainta massa pussant e ch'el maina il pövel illa tirania. Bliers pro- testants nu til pardunan ch'el ha müdà cretta ed es dvantà catolic.

1639

24 schner: Güerg Jenatsch vain mordrià illa ustaria «Im staubigen Huetli» a Cuoir. Il di davo vain el sepuli illa catedrala.

1639

Capitulat da Milan. Las Lias survegnan darcheu la Vuclina.

1641

Contrat da Feldkirch tanter las Trais Lias e l'Austria.

1649/52

Las Ot Drettüras e l'Engiadina Bassa as cumpran libras.

Finalmaing è'la qua, la libertà cha Marti- nus ha dechantà cun tanta verva:

*Schi canta laud à quell noss Deis
Ch'el ha udi ls suspürs dals seis
Ch'e ha nossa terr'incurunà
Cun uschè noebla LIBERTAT.*

Litteratura

- PIETH, Friedrich, Bündner Geschichte, Cuoir 1945
- HAFETER, Ernst, Georg Jenatsch, Tavo 1894
- PFISTER, Alexander, Jörg Jenatsch, Cuoir 1984
- PFISTER, Alexander, Jörg Jenatsch Briefe, Cuoir 1983
- DURNWALDER, Eugen, Kleines Repetitorium der Bündner Geschichte, Cuoir 1970
- MEYER, C.F., Jürg Jenatsch
- BERGER, Mathis, Die Ermordung Jenatschs, BMB 1960
- PORTA da, Nott, L'HISTORIA . . . , Scuol 1742
- NIGGLI, Stefan, Die Bündnerwirren, Bündner Schulblatt 1972/2
- ANNALAS da la Società retorumantscha
- DECURTINS, Caspar, Rätoromanische Chrestomathie, Erlangen 1908
- RADIOSCOLA, em. 131, Charta da Jenatsch a Sent, V. Stupan, ann. 19/5, 1973
- Illustraziuns: Museum retic; Archiv dal stadi; Chasa editura per mezs d'instrucziun, Cuoir



Als 24 da schner 1639 vain Jenatsch mordrià aint ill'ustaria «Zum staubigen Huetli» a Cuoirà.

Documaints

La rebelliun da Vutlina Ano 1620

Sun eir passads avant blers Segns Ano 618 & 1620 in la gronda part da la Vutlina sun las vignas in Avr. schetas, a 8. Mai in Sonders s'ha udi in il Taimpel da S.Gervas la nott ün dispittar da bler pövel, & üna splendor or dil Taimpel, chi illümnev'il Clucaer, voliond las guardias gnir gio a visitar, fo la glüm duos votas con früda stüza, è splendor svani. Il pais da las uras crudet gio in ün tratt, il sain grond dett desch votas clocca la nott, & trais sül di da sai s vess. A Tiran ha eir sunà il sain grond, & davo quel in palazi, ne s'ha chiattà ingün pro. In il palazi da Morbegn s'ha vis giond sù flömas da fö in Cel, la nott dil Nadal avant. A 18. Jul. & la nott per il stupent vent, & grossissem gots da plöfgia, fo in Rhetia é Vutlina grond stramizi.

Ano 620.19.Jul. a Tiran. La Domengia sül far dal di, sunen il Sain grond, e süsura tuot ils Sains clamond alla arma, ils saschins sün quai curren pertuot intuorn. Il famagl dil Podestà dil Telg, bavrond il Chiavà ven sagiettà il prüm; la donna dil Podestà Capol avr'ils balcuns per vair che sia, è vain sagiettà sün ella, ma bricha offaisa. Il Podestà dil Tegl Enderlin ferma cun la litera l'üsch in l'osteria, e's dosta fin ch'i nun hvet plü puolvra, ma'l Venosta rumpa gio il cel d'sura & il sagietta, il bütten lura da Balcun gio in la via, e'l traplen culs peis, fin chi nun s'cognoscheva plü, il strozchen cun üna sua alla riva dil flüm, & al davo fo sotterà.

Il Minister Antoni Bass con plüs s'han salvats in outra chià, & orevan, ma'ls morders ils chiattond ora, fen ir ora las femnas, e mazen ils mascels. Il cheu dil Bass taglen gio e'l purten sün Chianzla, dschond, ve gio, tü has löng predgià. . . . alla fin avrin cun forza, fen ir ora las femnas chi imprometten d'ir a Messa, ils auters mazen cun femnas 8 & 3 uffants. 17 mütschen in il Clucer, ma purten aint ils bancs e'ls fen arder.

Un Salis da Soilg sur 70 ons fo d'ün auter sagiettà tras, e davo plüs stilletadas, cun üna cord'a colöz, struzchià in il prossem foss.

Anna de Liba gni praisa sül munt, l'han provad'a far snejar la Cretta e sdrapar seis uffant da 2 mais or d'bratsch, ella il tegna, al davo snüdla il bruost e disch, mera'l corp, quel podai mazar, ma mia orma nun podai offender, quella recomond in teis mans o Bap Celestial! Sün quai la sagietten cul uffant in bratsch e la partin in 4 tocs.

Han eir fat gio ils Vapens dils Grischuns in Vutlina & ordinà ün nov mod da govern. Il Robustal s'nomneva Guvernadur.

Our da la cronica da Nott da Porta, 1742



Die Ermordung von Pompejus Planta auf Schloss Rietberg, Februar 1621

Traducziun our da Haffter, Urkundenbuch, S. 58

Bericht, wellicher gestalt Pompeius Planta den 15/25 Hornung anno 1621 frö vor tag hingerichtet worden, beschriben von einer person, so dabei gewäsen.

Durch Gottes gnad und barmherzigkeit sind wir unszers grösten feindts und landtsverräthers uff den hüttigen tag abkommen. Die sach hat also verlossen.

Nach dem wir mit 18 zu pferdt schlim gnug uff Bündtner gatung gestern den 14 Hornung by der nacht hinweg gefahren, sind wir kommen durch das fäldt under Chur einen gar bösen und gefährlichen wäg usz überlauff desz waszers. Nachgänz haben wir imm Vogelsang, neben dem quartier eines Fünff Ortischen fändlins, so zu Embsz glosziert, unsere pferd erfrischt und wider hinweg gereiset umb 3 uhren gegen tag: und desz verräthers schlosz Rietberg kommen früy vor tag, grad da syn rytknächt das thor uffgethon und gesinnet war zu verräthen. In dem wir in dem vorhoff hat er den braaten geschmöckt und zwo thüren zugespert, die wir mit zimlicher müy mit der axen und anderen instrumenten müsen uffbrächen und ihne inn den übrigen stuben und sälen gsucht und endtlichen in einer näbenstuben gefunden, welche er flyszig auch verwahrt. Underzwüsch wirt allenthalben in den Mäszischen Gmeinden im Tumläschg sturm gelütet. Pompeius wil uns usz diszer hoffnung mit guten worten uffhalten: wir aber brauchten gute instrument, trungen zu ihm hyneyn, fanden ihne ohne hosen, in einem wollen hembdt mit einem wehr in der handt, das er aber usz groszem schräcken zur gegenwehr nicht gebrucht, sondern weinende gesprochen: Ach, was hab Ich gethan, was hab Ich gethan. Hierauf ist ihme sein theil worden nach synem verdienen: dann er nidergehauwen, uffgeschnitten, das herz und ingeweid usz synem lyb geriszen worden. Ausz synem husz hat man von so vil kostlichen sachen nichts entwändet noch verruckt. Allein syne 3 rytperdt habend die soldaten by der handt geführt: wir aber sind mit unszeren corneten durch die schlacht ordnung der zusammen geloffenen Mäszischen puren geriten, sy mit backenstreichen empfangen und dröuwungen lauffen laszen, dasz die Evangelischen nicht ungerochen müszind usz Almäns vertriben syn. Daruff zugen wir gegen Embs und durch die statt Chur und sind wyter gsinnet, uff alle glegenheiten redlich zu verhalten, gäb was die Fünff Oertler heimlichs zu Zizers practicierindt.

Der thäteren waren überall 19 usz allen dreyn Pündten, namlich Ober Püntner, Engadyner und Münsterthaller usz dem Gottshusz, und Brättigöwer usz dem Zähen Grichten Pundt. Jedoch waren unden denen die fürnämbssten fändrich Gallus von Splügen, Clausz Carle von Hohen Balcken, gewesener landtammann im Münsterthal, herr Blasius Alexander und Görg Genazius usz dem Engadyn, und Ludwig Keszler von Grüşch usz dem Brättigöuw . . .



... duos autras cumpagnias genn sur Fuldera vers Zerne, mo vegnan tschessantadas. L'istess mardi, 26 october 1621 il Baldirun venn tras la Val S-charl, siand fùgidas las guardgias, pruvand cun tuotta forza da superar l'En. Mo per inguotta! Uschè eir il marcurdi e gövgia cumbattettan ils Engiadinais da tschert, perche la gövgia vulaiva la chavallaria da l'inimi cun ardimaingt incredibel vargiar l'En, aviand ars Pradella ... Cun tuot nu pudand l'imini suot Pradella far punt ingüna, neir vargiar nan l'En, cha blers vegnan mazzats e najantats alchüns, mo dals noss brich ün, schi passet l'inimi da quella vart da l'En sü fin in il lö dit Gurlaina e's mettet qua a bivacar sur not. Ils noss sajettaivan dal sunteri da Scuol via cun las schlaginas da Ramosch, tanter auter cun las duonnas insembel e mazzettan blers, dals noss restenn eir alchüns, eir dunauns. Mo l'inimi a mezza not as retret sü Sant Jon e la daman vegnan els nan sur l'aua da la Clemgia e gnan a Tarasp, nu's persögnand ils noss, fet l'inimi üna punt sur l'En nan in il lö dit Nairs. Dvantet qua grand contrast, mo al tandem stuvonn ils noss as render e mütschar cun perdita da blers da l'ün' e l'autra vart, perche l'inimi nu schaniet ingün brich ...

(Our da l'Istorgia Retica da Jachen Antoni Vulpius, scritta l'an 1705 e publichada l'an 1866 da Conradin de Moor)

E l'istograf Sprecher scriva:

«Sün il sunteri da Scuol furiaiva il cumbat bain lösch. Qua as defendettan alchünas dunans cun lur homens e gnittan l'ultim tuottas mazzadas, insembel eir blers da lur uffants.»

Annotaziun: Daspö quella jada han las dunans l'onur da sezzer in baselgia da Scuol da la vart dretta, il che ais amo hoz il cas.

A SCUOL SÜN IL SUNTERI

Cur cha dal septschientvainchün als vainchases dad october
our da S-charl as sforzaiva sco üna lavina pussanta
Baldirun cun sas rotschas sulvadias, e cha noss homens
our'a Nairs s'han ardüts a tegner la punt scha pussibel,
schi in malign attach l'inimi eir nan da Gurlaina
s'precipitet sül cumün, imnatschond darschiun e sconfitta.
Quai fuò il di: Las duonnas da Scuol s'retrèn sün sunteri
fand dad el lur fortezza, munidas cun armas paucilas,
fèn resistenz'efficazia, dostèn il tremend adversari
cumbattand cun lur vita per vita, per patria libra.*

Mà nu s'ha invlidà quel di d'ardimaingt e curaschi
cha dunnans s'parguajèn a far frunt ad armad'austriaca.
Mà nu's dess invlidar! I füt missa tischmuongia visibla:
*In la nav da baselgia dessan da quinderin via
sün las plazzas d'onur a dretta tour piazza las duonnas.*
Quai saj'il premi pels mierts acquistats in di da svantüra
Quai saj'il segn per muossar trasoura la recugnuschentscha
per quel evenimaingt. Dal rest per no eir ün stimol
d'esser s'vess curaschus, da ris-char, scha bsögn fess, eir la vita
pel patrimoni custaivel da patria, güstia e cretta.

*Uschè referischan las cronicas veglias da Jachen Antoni Vulpi
1706 e da Not a Porta 1742.

Flurin Pitsch descriva in 280 vers la pesta dal 1630 in Val Müstair

Milli ses tschient e trenta
gnit cun percha percuziata,
cun spada in fö intschalada,
cun frizza tössiantada.
Pels vainch da lügl as manifesta
in plain character dretta pesta.
In avuost in fin dal maiꝯ
pür s'ha il mal furius palais.
Aint il ultim quart d'la glüna
jet cun cresch la disfurtüna.
Vainch e quatter in ot dis
s'po dir chi sun perits.
Las mortaglias creschan sü
ils sains nus sunan plü,
vain minchatant ün char cun morts
chi mainan sün sunteri:
povers, saimpels, richs e scorts,
tuots masdats in ün lavureri.
La pesta pür tschesset
cura glied plü nu chattet.
Sun baras quarantot
be sül "Döss" sulet.
Scha quai nu füss abot
eir quarant'in "Plaz" crodet.
Be la clastra term ot dis
vaincheses sun gnits culpits.

Uals ot da lügl invia strindsch
infin november vainchetschinch
las baras vegnan a cuntegner
morts tschinchtschient spartits i'l Segner.
L'ultim vain amo quella not
murit nos podestà Catoc.
Passà la granda calamità
schi tuots chi sun tuornats a chà,
da Vnescha ed aint da Buorm
ed aters lous intuorn.
Tuots insembel tschientvainchün
faiv'oura nos cumün.
Uen sudà nativ da Damal
ans manet nanpro quist mal
da guerr'e granda battaglia
sper Mantua cun granda martaglia.
Quist malhorus sudà
da la battaglia tuorn'a chà.
A Sa.Maria sta'l sur not,
paraiv'ün pa malcot.
A zuond ingün füss gni per testa
ch'el pudess avair la pesta.
Dalunga quella fet progress
e quattertschientesesanta baras
in pitschen temp füt il success
cun bleras larmas ed amaras.

«... a *Ramosch* n'ha eu fat render la chasa e pajar la pravenda, a *Tschlin*, ingio cha las duonnas am laivan accrappar ed ingio ch'eu füt costret d'als dir ch'eu nu discuorrerà pled schi nu fan star d'avent a quellas duonnas, n'ha eu ordinà, cha in la baselgia sura, ingio cha'ls paders han l'altar ed ils ogets per celebrar (la messa), saran quaists paders adüna ils prüms a celebrar (il cult), la stà fin ad uras 9, l'inviern fin a las 10; il culuoster chi sunarà per ils protestants dess gnir pajà da quels sainza dan dals catolics, quals as ston s'inservir dals sains da la baselgia sura laschand als oters ils sains da la baselgia suot, ed il prüm restarà la baselgia sura a disposiziun dals paders, lura vöglian ils protestants avoir in quel lö ün predichant, ed aviand raggiunt quaist böt nu sun els cuntaints da spettar fin a las 9 o a las 10 per ir in baselgia, e per quaist motiv faran els adöver da la baselgia suot. Vossa Signuria vezza our dal contrat aggiunt fat giò cun els quant ch'eu n'ha pudü operar cun *quaists da Tschlin chi sun plü ostinats* co tuot ils oters, ad ün'otra cunvegna nun esa pussibel da tils manar o sforzar, sun be ses vaschins mas-chels catolics, eu discuor dals creschüts, e quels stan al punct da cascar per interess particular ... »

Id ais dimena reuschi a Jenatsch (cun sia cuntschainta eloquenza) da buniar perfin als «stinats Tschiainders». Ils catolics han survgni tras el il privilegi in l'adöver da la baselgia. Be a Sent nun ha Jenatsch gnü grand success, uschigliö ha el sgürà dapertuot il cult catolic.

Dumonda: Perche ha Jenatsch — plü bod ravarenda protestant e grond adversari dal catolicissem — sustgnü ils chapütschins in lur cumbat cunter ils protestants? Fingia daspö divers ons s'occupaiva Jenatsch culla dumonda da conversiun. Daspö il 1633 survgniva el instrucziun illa doctrina catolica pro' ls chapütschins a Rapperswil ... dal 1635 s'ha el alura converti.

Sur da sia conversiun ha Jenatsch svesta scrit a seis amis: «beschuldigt mich nicht, dass ich die Messe besuche; klagt mich lieber an, dass ich sie nur selten besuche!» (Alexander Pfister: «Georg Jenatsch, Sein Leben und seine Zeit», Basel 1939, pagina 235.)

Dimena, Jenatsch ha gnü grond success cun sia mischiun in Engiadina bassa. Da quai eiran natüralmaing ils catolics zuond inchantats. L'ovais-ch da Como survgnit il cumond da Roma dad ingrazchar a Jenatsch per seis bun servezzan a favur da la baselgia universal catolica in Engiadina bassa.

«... signor Colonello Gianazza, il quale si è diportato molto bene per le nostre missioni.» (Pfister, pagina 166)



Georg Jenatsch

1596–1639

Ch'ün dia pür che ch'ün vol,
schnear la grandezza nu po'l
a Jenatsch, l'eroe grischun
da forza sco ün liun.

I'l tèmp il plü disastrus,
nels ans ils plü dolurus,
cha nos Grischun ha fat tras,
ais stat Jenatsch il plü schlass.

Il plü avedut, curaschus,
in tuot seis far valurus,
sur nos pajais ha'l vaglià
ed independenz' acquistà.

Ch'el tgnat libertà il plü ot,
perque al rendain nus lod.
Ad el ais bler pardunà:
La patria surtuot ha'l amà!

Jachen Luzzi
Our dal Chalender Ladin, 1931

Persunas importantas

JENATSCH Israel, 1560–1624, predichant e nuder a Silvaplana, bap da Güerg

JENATSCH Güerg, 1596–1639, predichant, guerrier, politiker

BUOL Anna, 1598–1673, da Tavo, duonna da Güerg Jenatsch

ALEXANDER Blasius (ZONDER Plasch), 1590–1623, da Sent, predichant e guerrier, ami da Güerg Jenatsch, decapità a Puntina

ALEXIUS Caspar (ALIESCH Chasper), 1576–1626, da Chamues-ch, predichant, professor da teologia, manader da la scoula da Sondrio, ami da Güerg Jenatsch

Carl da Balcun Aut, da Müstair, cumpogn da Jenatsch pro'l mordraretsch da Pompejus Planta

GABRIEL Steivan, predichant a Glion, ami da Jenatsch

GULER Johann Peter, colonel in servezzan frances, partecipà al mordraretsch da Jenatsch

PLANTA Pompejus, 1569–1621, politiker ed uffizial, manader dal parti spagnöl, mordrià sün seis chastè da Rietberg

PLANTA Rudolf, 1570–1638, frar da Pompejus, politiker ed uffizial in servezzan da l'Austria, chastè da Wildenberg a Zernez

RUINELLI Jakob, uffizial, ami da Jentasch chi til coppa in ün duel

SALIS-Soglio Gian Battista, politiker, uffizial, chavalier benestant

SALIS Herkules, 1566–1620, manader dal parti frances–venezian

TOUTSCH Bonaventura, predichant, ami da Jenatsch

VULPIUS J.A., predichant, ami da Jenatsch, da Ftan

Baldirun, general austriac

COEUVRES, cumandant da las armadas francesas e grischunas 1624–26

DU LANDE, uffizial frances, rimplazzant da Rohan

FERNAMONT, general austriac in Vuclina e Val Müstair

FERIA, Spagnöl, duca da Milan

LASNIER, intendant frances suot Rohan

LEOPOLD V., duca d'Austria e Tirol, maridà cun Claudia de Medici, suveran da las Ot Drettüras, da l'Engiadina Bassa e da la Val Müstair

PADAVINO Giambattista, ambaschadur venezian.

RICHELIEU, cardinal, manader da la politica in Frantscha

ROBUSTELLI Giacomo, manader da la rebellun in Vuclina 1620

ROHAN Henri, duca, 1579–1638, general frances, uguenot, manader da las truppas in Grischun e Vuclina

RUSCA Nicolo, archipreir da Sondrio, torturà a Tusan dal 1618


PREVOST, Zambra, da la Bergiaglia, sentenzià a mort a Tusan dal 1618

Güerg JENATSCH

- 1596 ca. Naschentscha da Güerg, figl dal ravarenda Israel Jenatsch e d'Ursina Balastin. Infanzia a Silvaplana.
- 1610 Güerg Jenatsch cumainza seis stüdi a Turich. Sias prestaziuns fan star stut a seis conscolars ed a seis magisters. El survain ün stipendi e va a tabla pro'l «Mueshafen», ün'instituziun per stüdens povers.
- 1613 Jenatsch as deporta mal e perda il stipendi. Per pudair finanzia seis stüdis dà'l uras privatas als figls dal chavalier Baptista de Salis-Soglio. Pervi d'üna baruffa e pervi dal deport arrogant davant il cussagl da scoula vain Jenatsch exclus da la scoula.
- 1616 Jenatsch stübgia a Basilea.
- 1617 A la Sinoda da Tumein praista Jenatsch il güramaint süls artichels da la credentscha. El dvainta ravarenda a Scharans.
- 1618 Davo la Sinoda da Bravuogn as metta Jenatsch a la testa dal parti venezian.
Insembel cun seis amis Blasius Alexander e Chasper Alexius maina el las «binderas» d'Engiadina Bassa e Val Müstair cunter il parti spagnöl. Jenatsch es ün dals güdischs fanatics da la Drettüra noscha da Tusan. Las sentenzchas sun fich crudelas. Rusca e Prevost mouran sül lö.
Pompejus e Rudolf Planta vegnan sbandits dal pajais. Sch'els vessan da tornar, tils dess il bojer squartar e las parts dessan gnir pichadas sù vi da pals pro cruschadas da vias.
Jenatsch banduna la pravenda da Scharans e va sco predichant a Berbenno in Vuclina.
- 1619 La Sinoda da Zuoz cundanna il deport dals predichants chi sun stats sco güdischs a Tusan. Jenatsch e Blasius vegnan suspais per ün mez on dal servezzan da ravarenda. In Vuclina as deportan els sco puobs invers la populaziun catolica.
Dals Vuclinas-chs haja nom: «La tristezza era in tutte le anime, la vendetta in tutti i cuori.»
Güerg Jenatsch as marida cun Anna Buol da Tavo.
- 1620 **19 lügl:** Mordrarettsch in Vuclina. 600 protestants vegnan coppats dad aschaschins manats da Jacob Robustelli. Var 70 persunas, tanter quellas eir Jenatsch e sia duonna, mütschan sur il Muretto fin in Engiadina.
Jenatsch bratta la Bibla culla spada. El es d'uossa invia guerrier da manster.
Duos prouvas da reconquistar la Vuclina sun sainza success.
Davent da Turich observa Jenatsch che chi capita sül chomp politic illas Trais Lias.

- 1621 **25 favrer:** Jenatsch as partecipescha al mordraretsch da Pompejus Planta a Rietberg.
marz: Jenatsch e seis amis s-chatschan las truppas da Beroldingen our da Surselva. Els survegnan il surnom «Ils quatter Guglielms Tell».
utuon: Las armadas austriacas occupan il Grischun. Jenatsch mütscha a Turich.
- 1622 Revolta dals Partensers.
 Seguonda invasiun dals Austriacs.
- 1624 Sco chapitani in servezzan frances piglia Jenatsch part a l'expediziun militara in Vuclina.
- 1626 Jenatsch survain l'incumbenza dad intermediar in Engiadina Bassa in du-mondas da la religiun.
- 1628 Jenatsch in servezzan da Venezia. Guerra da Mantua.
- 1629 Terza invasiun dals Austriacs. Jenatsch vain miss in praschun a Venezia. Las armadas austriacas derasan la pesta in bod tuot las valladas dal Grischun.
- 1630 Jenatsch va a star a Katzensteig SG.
- 1631 Jenatsch in servezzan da la Frantscha. Il duca da Rohan occupa il Grischun. Il cardinal Richelieu nun ha intenziun da surdar la Vuclina a las Trais Lias. Gronda malcuntantezza.
- 1634 Jenatsch ha darcheu da trattar culs cumüns d'Engiadina Bassa pervi da la libertà da la cretta. Quista mischiun til es üna nusch magari düra! A Tschlin til vöglian las duonnas accrappar.
- 1635 Jenatsch müda cretta.
 Rohan occupa l'intera Vuclina, mo el nu tilla po surdar als Grischuns.
- 1636 L'opposiziun cunter la politica da la Frantscha crescha. Davo la rain da Rohan via tratta Jenatsch cull'Austria e la Spogna. El voul deliberar il pajais da tuot las truppas estras.
- 1637 Jenatsch tradischa a seis patrun ed ami Rohan. Ils Frances bandunan il Grischun.
 Jenatsch as metta a la testa da la politica grischuna.
- 1638 Trattativas cun l'Austria e la Spogna pervi da la restituziun da la Vuclina. L'opposiziun (e l'invilgia) cunter Jenatsch dvainta vi e plü gronda. Sün cumond da Jenatsch vain mordrià il commerciant Stampa da Clavenna.
- 1639 **24 schner:** Güerg Jenatsch vain mordrià ill'ustaria «Zum staubigen Hüetli» a Cuaira. Il di davo vain el sepuli cun gronda pompa militara illa catedrala da Cuaira.

La pusiziun da las Trais Lias tanter ils gronds imperis da l'Europa intourn il 1600



- Legenda:**
1. _____
 2. _____
 3. _____
 4. _____
 5. _____
 6. _____
 7. _____
 8. _____
 9. _____
 10. _____

Cugnuoschast amo il territori da las Trais Lias?



Lia da la Chadè



Lia Grischa



Lia da las desch Drettüras



Territori austriac: Tarasp, Haldenstein

Terras sudittas: BUORM

VUCLINA

CLAVENNA

VNUOST, fin dal 1618 pro la Lia da la Chadè



La Via Sura e la Via Suot

vers l'Italia


Scriva aint in quist disegn ils noms cun agüd da la charta grischuna e dal text!

cumüns

chavorgias
pass

vals

Disegna la Via Sura in blau, la Via Suot in cotschen





Quia fa il disegnadur schnöss da las Trais Lias. Il stadi es muossà sco ün aristocrat chi ha lià ils mans cullas curajas da trais buorsas bain implidas cun raps. Sün quistas buorsas as vezza las vopnas da Venezia, da la Frantscha e da la Spogna. **Declera!**

Impè d'ün cheu sun disegnadas plü d'üna dunzaina da figüras da bes-chas e d'umans: ün dragun chi spüda fö, ün uors, ün luf sgiarbader, ün'ocha chi travuonda üna rana. Süssom cumparan ils cheus da Güerg Jenatsch, e da Pompejus e Rudolf Planta.

Giosom, pro'l culöz, as dispittan il predichant protestant e'l preir catolic. Els sun circondats da cheus d'uffants e da narramainta. Eir pro quista gruppa as vezza bes-chas: il bouv e l'asen, il gial, la vuolp, l'anda. **Discutai!**



Uschè sarà Jenatsch stat vesti als 24 schner 1639. El portaiva büschmainta luxuriusa da valü e da saida. Las chotschas d'eiran da lana.
Jenatsch d'eira ca. 1.70 m grond. Pel 17avel tschientiner d'eiran quai var 10 cm sur la media.



Güerg Jenatsch (1596–1639)
(Intagl da Men Rauch)

JENATSCH

Id arda! Tuot ais flomma e fümaglia.
Il Baldirun ais qua cun sa marmaglia.
Las Lias tremblan suot la griffa d'aglia.
Be ün as metta cunter cun ferm bratsch:
L'ardit Jenatsch.

Per gnir a böt el seis fadiv mordrescha,
La cretta schneja'l e l'ami tradescha.
Tuot spüda tössi e t'il schmaladescha.
Ma el as tegna sgür e franc sül glatsch:
L'astut Jenatsch.

Fingià sa patria vezza'l liberada
E l'ouvra da sa vita curunada.
Qua seis destin s'approssma in mascrada.
I tschantschan la pistola e'l mördatsch:
Mort ais Jenatsch.

Il dscherm ch'el implantet in terra düra
Cul ir dal temp dschermuoglia e madüra
La libertà sclerescha la not s-chüra
E liber il Grischun ais gnü dal latsch;
Viva Jenatsch! Men Rauch

Il cumbat tanter ils duos partits politics es stat dūr, crudel e sainza remischün. Apaina ch'ün vaiva battü a tschel, seguiva la cunterattacha.

Cumplettescha quista survista:

CUOLP

CUNTERCUOLP

dal parti

dal parti

1603: Lia cun O

O 1603: Milan erigia la fortezza

1618: Drettüra penala da O

O 1619: Drettüra penala da

1620: Drettüra penala da O

O 1620: 19 lügl:

1621: 25 favrer: O

O Occupaziun dal Grischun tras:

1622: Dumengia
da las Palmas O

